

十六國春秋

四部備要

史部

上海中華書局據漢魏叢
書本校刊

桐鄉 陸費達總勘

杭縣 高時顯輯校

杭縣 吳汝霖校
丁輔之監造

版權所有不許翻印

十六國春秋目錄

前趙錄 劉曜 劉聰

後趙錄 石勒 石宏

前燕錄 慕容廆 慕容皝 慕容暉

前秦錄 苻堅 苻丕 苻生 苻萇

後秦錄 姚弋仲 姚襄 姚萇

蜀錄 李特 李流 李壽 李勢 李雄

前涼錄 張軌 張寔 張天錫 張重華

西涼錄 李歆 張元

北涼錄 沮渠蒙遜

後涼錄 呂光 呂纂

後燕錄 慕容垂 慕容寶 慕容盛

南涼錄 李弘 李歆 李虔

南燕錄 慕容超 慕容德

西秦錄 乞伏國仁 乞伏乾歸 乞伏慕末

北燕錄 馮跋 馮弘 馮翼

夏錄 赫連勃勃 赫連昌

前趙錄

魏崔鴻撰

劉淵

劉淵字元海新與匈奴人先夏后氏之苗裔曰淳維世居北狄千有餘歲至冒頓襲破東胡西走月氏服丁零內侵燕代控弦四十萬漢祖患之使劉敬奉公主以妻冒頓約爲兄弟故子孫遂冒姓爲劉氏建武初入居西河美稷后漢中年單于羌渠使子於扶羅將兵助漢討平黃巾會羌渠爲國人所殺於扶羅以其衆留漢自立爲單于屬董卓之亂寇掠太原河東屯於河內於扶羅死弟呼廚泉立以於扶羅子豹爲左賢王卽元海之父也魏武分其衆爲五部以賢王豹爲左部帥其餘部帥皆以劉氏爲之太康中改置都尉雖分屬五部皆家於晉陽汾澗之濱豹妻呼延氏魏嘉平中祈子於龍門有一白魚頂有一角軒轅躍鱗而至祭所久之乃去巫覡皆異之曰此嘉祥也其夜夢所見魚變爲人左手把一物大如雞子光景非常授呼延氏曰此是日精服之生貴子寤以告豹豹曰吉徵也自是十五月而生淵淵生左手有文曰淵海遂以爲名幼而好學不舍晝夜嘗謂同門生朱紀范隆等曰吾每觀書傳常鄙隨陸之無武絳灌之無文一物之不知固君子取之也二生遇高皇不能建封侯之業兩公屬太宗不能開庠序之美惜哉於是文學武事並皆工絕援臂善射膂力過人身八尺四寸鬚長三尺餘當心有赤毫毛三根長三尺六寸太原王渾虛襟友之命子濟拜焉咸熙中爲侍子在

洛陽晉文帝深待之時東萊王彌等皆憑結渾又屢言之晉帝帝召見與言大悅之后謂王濟曰劉元海容貌風儀譏談鑒智雖金日磾無以加也會父豹卒帝以淵代爲左部帥轉寧朔將軍監五部軍事大安中惠帝失政諸王迭相殘廢州郡奸豪所在蜂起從祖北部都尉左賢王劉宣等議曰今司馬氏骨肉相殘興復在此時矣左賢王淵姿器絕人幹宇超世天若不恢崇單于終不虛生此人也於是共推劉淵爲大單于劉淵曰當爲崇岡峻阜何能爲培塿乎夫帝王豈有常哉大禹生於西戎文王生於東夷顧惟德所授耳今見衆十餘萬皆一當晉十鼓行摧亂晉猶拉枯耳上可成漢高之業下不失爲魏武何呼邪韓足道哉宣等稱善元熙元年遷於左國城晉人東附者數萬宣等上尊號淵曰今晉氏猶在四方未定可仰尊高祖法且稱漢王權停皇帝之號待宇宙混一當更議之十月爲壇南郊卽漢王位改晉永興元年爲元熙元年大赦天下追尊劉禪爲孝懷皇帝立高祖以下三祖五宗之神主而祭之置百官以劉宣爲丞相拜授各有差四部之東萊王彌起兵青徐遣使來降拜鎮東大將軍青州刺史東萊郡公四月汲桑叛自稱趙王選置州郡十一月石勒及胡部等帥衆來降永鳳元年七月鳳凰集於蒲子丞相劉宣等六十四人上尊號十月僭卽皇帝位於南郊大赦改元以衛軍和爲大將軍撫軍總爲車騎大將軍建武曜爲龍驤大將軍河瑞元年遷都平陽汾水得玉璽大赦改元二年以大司馬梁王和爲皇太子八月淵寢

疾以劉洋爲太尉延年爲太宰司徒總爲大司馬大單于並錄尚書事置單于于平西薨于光極殿太子和卽位聰自西明門攻斬和於西室九月葬淵于永光陵諡曰光文皇帝廟號高祖

劉聰

劉聰字元明一名載淵第四子母張夫人孕夢日入懷寤而告淵淵曰吉徵也自是十月而生聰夜有日光之異左耳有一白毫長二尺餘幼而聰悟究通經書百家之言孫吳兵法靡不誦之援臂善射彎弓三百斤膂力驍捷冠絕一時永嘉四年僭卽帝位于光極前殿大赦改元光興元年以衛尉呼延晏爲使持節前鋒大都督配禁兵二萬七千自宜陽入洛川命東萊王彌劉曜及鎮軍石勒進軍會之晏比及南王師前后十二敗晉師長驅圍洛陽陷之聰兵大掠幽晉帝於端門害太子及百官已下三萬餘人於洛水北築爲京觀遷帝及太后侍中庾珉等于平陽大赦改元嘉平元年二月內晉帝進號儀同三司會稽郡公聰引帝入譙謂曰卿爲豫章王時朕曾與王武子相造武子示朕於卿卿言聞其名久矣以卿所作樂府歌文示朕謂朕曰聞君善爲辭賦試爲看之朕時與武子俱爲盛德頌卿稱善久之又引朕射于皇堂朕得十二籌卿與武子俱得九籌卿贈朕拓弓鏃硯頗憶否帝曰臣安敢忘之但恨爾日不早識龍顏耳聰曰卿家骨肉相殘何其甚也帝曰此殆非人事皇天之意也大漢將應乾受曆故爲陛下自相驅除耳且臣家若能奉武皇之業九族敦睦陛下何由得

之三年春正月宴於光極前殿逼晉帝行酒庾珉王雋等起而大哭聰惡之二月丁未懷帝崩于平陽於是誅珉等三月立貴嬪劉氏爲皇后四月愍帝卽位於長安車騎曜等攻長安河東地震雨于平陽建元元年正月黑霧四塞人如黑五日而止辛酉時日落地三月相承出於西方東行平陽地震崇明觀陷爲池水赤如血赤氣至天有赤龍奮迅而去流星起於牽牛入紫微龍形逶迤其光照地落子平陽北十里視之則肉臭聞於平陽長三十步廣二十七步肉旁常有哭聲晝夜不止聰甚惡之癸未劉后產一蛇一虎各害人而走尋之不得頃之見在隕肉之旁己丑劉氏卒乃失此肉哭聲亦止十一月以晉王粲爲四相大單于總百揆十二月宣光陵石人皆行數步宮中鬼哭聲武庫陷入地一丈五尺聰自去冬至是遂不復受朝賀軍國之事一決于粲立市於后庭與宮人宴戲或三日不醒秋七月河東大蝗唯不食粟豆司隸靳準率部民收而埋之哭聲聞於十餘里后乃鑽土飛出復食黍豆大司馬曜攻陷長安外城九月犬與豕交于宮門有豕著進賢冠昇聰御座犬冠武冠帶綬與豕並昇俄而鬪死殿上宿衛莫有見其入者長安饑甚死者過半麴允爲粥以供帝膳帝泣曰今窘厄如此外無救援勢不自知乃使侍中宋敞奉牋降曜敞隨使者至帝肉袒牽羊與觀瞻壁出降東門曜受璧焚觀遷愍帝及司徒梁汾驃騎麴允等諸臣百餘人至於平陽聰臨光極殿帝稽顙與麴允伏地大哭扶不能起聰大怒允自殺以帝爲光祿大夫

懷安侯以大司馬曜假黃鉞大都督陝西諸軍事太宰秦王二年正月東平王約卒十一月聰校獵上林以晉帝行車駕大將軍戎服執戟前導行三驅之禮觀者皆指帝曰此故長安天子聚而觀之故老亦有悲泣者十二月大饗于光極前殿聰欲觀晉臣之意使帝行酒洗爵更衣使帝執蓋多有涕泣或有失聲者尙書郎辛賓起而抱帝大哭引出斬之戊戌愍帝崩於平陽三年聰所居蠡斯則百堂災焚其子會稽王哀已下二十有一人聰聞哀塞自此鬼哭宮中至于九月夜聲不絕四月尙書令王監崔懿之等極諫聰大怒收監等殺之秋七月鬼哭於光極殿聰晝見東平王約甚惡之徵秦王曜爲丞相錄尙書事固辭仍以丞相領雍州牧斬準爲大司空領司隸校尉癸亥薨于建始殿甲子粲即位大赦改元漢昌葬宣光陵諡曰武皇帝廟號烈宗八月以丞相曜爲相國大都督司空斬準爲大將軍尙書事粲荒耽酒色遊宴后庭軍國之事一決於準準遂勒兵入宮執粲數而殺之追諡靈帝劉氏無少長男子盡刑于市發掘二陵焚燒宗廟鬼大哭聲聞百里準自號漢大王置百官遣使稱藩于晉相國曜自長安赴難永嘉元年十二月大將軍東平王約卒一指猶煖遂不殯斂至甲戌乃蘇言見淵於不周山經五日遂復從至崑崙山三日而復反於不周見諸王公卿將相死者悉在大有人民宮室壯麗號曰蒙珠離國淵謂約曰東北遮須夷國無主久待汝父爲之汝父二年當來后國中大亂相殺害吾家死亡略盡但可永明

輩數十人在耳汝但還后年當來見汝不遲不久約拜辭而歸道過一國曰猗尼渠余國引約入宮與皮囊一枚曰爲吾遺漢皇帝約辭而歸謂約曰劉郎后年來必見過當以女相妻約歸置皮囊於機下俄而蘇謂左右曰機上取囊來左右取得開有一方白玉題文曰猗尼渠余國天王敬信遮須夷國天王歲在攝提當相見馳使奏呈聰曰若當如此吾不懼死也及聰以戊寅歲薨與此玉并葬焉

劉曜

劉曜字永明淵之族子少孤見養於淵幼而聰慧性拓落高亮與衆不羣鉄厚一寸射而洞之身長九尺三寸手垂過膝生而眉白目有赤光鬚不過百餘根皆長三尺光初元年十月太保呼延晏等自平陽來奔上尊號於曜僭即皇帝位十二月斬準左右軍騎喬太王騰等殺準奉六璽來降二年夏四月徙都長安立子熙爲皇太子六月繕宗廟社稷南北郊于長安令曰蓋王者之興必禘始祖我皇家之先出自夏后居于北夷世跨燕朔光文以漢有天下歲久恩德結於庶民故立漢祖宗之廟以懷民望昭武因循遂未峻革今欲除宗廟改國號御以大單于爲太祖其議以聞於是太保呼延晏等議曰今宜承晉母子傳號以光文本封盧奴中之屬城陛下勳功茂於平洛終於中山中山分野屬大梁趙也宜革稱大趙遵以水行曜從之於是以前頓配天淵配上帝三年五月西明門內大樹風吹折經一宿樹撥撥變爲人形髮長一尺鬚眉三寸皆黃白色有斂手之狀亦有兩脚

着履之形唯無目鼻每夜有聲十日而生柯條遂爲大樹枝葉甚茂四年將於霸陵西南營壽陵侍中喬豫和苞上疏諫曰臣等伏聞勅旨將營建壽陵周圍四里下深二十五丈以銅爲棺槨黃金飾之臣聞堯葬穀林市不改肆顓頊葬高陽下不及泉聖王之於終也如是秦始皇下錮三泉周輪七里身亡之後毀不旋踵闢王之於終也如此後喪亂以來漢帝諸陵咸見踐辱唯霸陵獨全此雖太宗之達至然抑亦釋之之功興亡奢儉炯然於前唯陛下覽之曜大悅終南山崩所得白玉方尺有字曰皇王皇亡敗趙昌以爲己瑞郡臣咸賀中書監劉均曰山崩石壞國傾民亂皇王皇亡敗趙昌者此言皇室將爲趙所敗趙因之而昌大趙都於秦雍而勒跨全趙趙昌之應當在石勒不在我也曜慨然改容五年曜后羊氏卒故晉惠后也洛陽之陷納之六年正月天裂廣一丈餘長五十丈十一年七月石虎率衆四萬人寇擾河東進蒲坂曜選中外精銳自潼關北濟虎懼引師而還曜追而敗之枕尸一百餘里虎奔朝歌遂攻石生於金墉分遣諸將攻討汲郡河內十二月勒自帥衆拒之陣於洛西曜性少酗酒末年尤甚將戰飲數斗常乘赤馬無故蹋頓乃乘小馬北出復飲斗餘至西陽門擣陣就平勒將石堪因而乘之師遂大潰曜昏醉奔退而馬陷石渠墜於冰上爲堪所執勒將還襄國喻曜使與太子毗書令速降曜但勅毗與諸臣匡維社稷勿以吾易意建平末爲勒所殺十二年正月太子毗大司馬南陽王胤等議欲西保秦州遂相率奔上

邽石虎乘勝追戰枕尸千里上邽潰虎執毗及王公已下三千餘人皆殺之自劉淵建號西河至是二十有六載

前趙錄

後趙錄

魏崔鴻撰

石勒

石勒字世龍上黨武鄉羯人父周曷朱勒生時赤光滿室白氣自天屬於庭中長而壯健有膽力雄武好騎射幼而力耕每聞鞞鐸之聲或在前後歸以告其母母曰作勞耳鳴非不祥也會并州刺史司馬騰執諸胡山東賣充軍實將詣冀州兩胡一枷勒亦在中東至中原賣與并平人師懽爲奴每夜於野嘗聞鞞角之聲諸奴亦聞歸以白懽懽奇而免之隣於馬牧率汲桑往來勒以能相馬自託於桑而備於武安臨水爲遊軍所囚會有羣鹿旁過軍人競逐之勒乃獲免俄而見一老父謂勒曰向羣鹿者我也君應爲中州主故相救耳勒拜而受命遂招集王陽藁安等十八騎復東如赤龍諸苑中乘宛馬遠掠繒寶以賂汲桑永興元年關東所在盜起二年陽平人公師蕃等自稱將軍起兵趙魏衆至數萬勒與汲桑率牧人乘苑馬數百騎以赴之桑始命勒以石爲姓以勒爲名永嘉元年勒歸劉淵拜爲輔漢將軍晉平王淵薨聰襲位劉曜王彌圍洛陽勒帥精騎二萬會之王彌既平洛陽將先誅勒勒請彌燕于己營手斬彌而并其衆將軍郭默獲沙門竺浮圖澄以其有道術進之於勒試之有効甚尊重之前趙嘉平二年張賓說勒曰邯鄲襄國趙之舊都依山憑險形勢之固可擇此二邑而都然後命將四出授以奇略王業可圖石勒於是進據襄國聰授勒都督幽冀并營四州諸軍事冀

州牧進封本郡公邑萬戶三年以征虜將軍爲魏郡太守鎮鄴三臺篡奪之謀兆於此矣前趙嘉麟元年劉琨遣姚濟帥衆來討勒與戰濟軍大敗琨長史李宏以并州來降七月劉聰疾甚以勒爲大將軍錄尚書事受遺輔政勒固辭乃止劉曜稱尊號將授勒太宰大將軍加九錫增封十郡并前二十郡出入警蹕如曹公輔漢故事曜聞平樂之言停太宰之授勒大怒曰趙王趙帝孤自取之名號大小豈爾所呼耶征虜虎與左右長史張敬張賓等上號曰大司馬雖位冠九台非伯者之號請改稱大將軍大單于領冀州牧趙王在鄴故事以二十四郡戶二十九萬爲趙國十一月勒卽位改元稱爲趙王元年始建社稷立宗廟主書司典胡人出內重其禁法不得侮易衣冠華族號胡爲國人二年令曰國人不聽報嫂及在喪婚娶至於燒葬令如本俗八月始置軒懸之樂八份之舞作金銀大輪黃屋左纛天子禮樂於斯備矣三年黎陽民陳武妻產三男一女上書自陳令曰昔周之興也四乳八子今武妻一乳四子可謂度過姬祥矣加曩日其賜乳婦一人穀百石雜繒十四疋庶以肅迎嘉祥冬十月勒親與鄉老齒坐懽飲語及平生勒曰李陽壯士也孤方取之何以不來父老歸語令速來溫麻池之忿是布衣之恨孤方崇信于天下寧譬匹夫乎令曰武鄉吾之豐沛也其復之三世十一月李陽至勒與酣諠引陽臂笑謂之曰卿雖老臂中猶有力頗復與人鬪孤往日厭卿老拳卿亦飽孤毒手因賜里第一區拜爲都尉陽與勒隣居歲長爭溫麻

池迭相毆擊四年二月拜子宏爲世子勒雅好文學雖在軍旅之中常令儒生讀春秋史漢諸傳而聽之聞鄴食其勸立六國后大驚曰此法當失何以得成天下至留侯諫乃曰賴有此侯耳其天資英達如此八年八月脩三臺三月以世子衛將軍宏鎮鄴太和十年劉曜圍洛陽襄國大震勒統步騎四萬赴金墉濟自大碣先是流斯風猛軍至冰泮清和濟畢流斯大至勒以爲神靈之助命曰靈昌津戰於西門曜軍大潰石堪執曜送之二年曜子熙等去長安奔于上邽車騎虎剋上邽遣主簿趙封奉傳國玉璽送之秦隴西建平元年二月車騎石虎等上尊號勒不許固請勒號趙天王行皇帝事大赦八月羣臣又固請以名位不正宜卽尊號九月僭卽皇帝位大赦改年正月勒南郊有白氣自壇屬天勒大悅四月勒如鄴議營新宮廷尉續咸諫曰臣聞唐虞之治采椽茅次土階三尺美彰于詩書漢文惜百金不營露臺稱之於千古迨夏商之瓊臺瑤陛楚章華秦阿房資財內竭華夷外叛勒詔曰且勅停作以申吾直臣之氣九月以太尉中山王虎爲大司馬程遐開府儀同是月大霖雨中山西北暴水漂流巨木萬餘根集于堂陽勒大悅謂公卿曰此非爲災天意欲吾營鄴都耳於是營之勒以成周漢晉舊京欲有移都之意乃命洛陽爲南都置行臺治書侍御史于洛陽三年正月大饗于建德殿酒酣勒謂徐光曰朕方自古開基何等主也光對曰陛下神武籌略邁於高皇雄藝卓犖超絕魏武三五以來無可比也其軒轅之亞乎勒笑曰人

豈不自知卿言亦已太過朕若逢高皇當北面而事之然猶與韓彭競健而爭先耳倘遇光武當並驅于中原未知鹿死誰手大丈夫行事當疊疊落落如日月皎然終不能如曹孟德司馬仲達欺他孤兒寡婦狐媚以取天下也朕在二劉之間耳軒轅豈所擬乎羣臣皆稱萬歲四年雍州刺史石生上言西鄉行死蛇鼠鬪於安定府間二日蛇死臨涇馬生角長安城中鷄鳴音皆曰基慈安定廳事前後聞誦書聲求之不得七日乃止隕石于肥鄉六月勒寢疾召中山王虎太子宏中常侍嚴震等侍疾禁中七月薨于西閣僞諡明皇帝號高祖

石宏

石宏字大雅勒第三子母程夫人右光祿遐之妹建平元年立爲太子虛矜愛士好爲文詠其所親昵莫非儒素勒謂徐光曰大雅情性殊不似將家子光曰漢祖以馬上得天下孝文以玄默守之聖人之後必世勝殘天之道也勒大悅程遐言於勒曰中山怏怏不可以輔少主乞早除之以便大計勒不從勒薨虎執政臨軒召子冀州刺史遂兵入禁宿衛文武無不奔散宏大懼策拜中山王虎爲丞相以十三郡封爲魏王又加九錫虎僞讓后乃受之延熙元年七月改頓邱爲魏國沿魏郡至黎陽十月宏齋璽綬親詣魏公喻禪意虎曰宏昏昧愚暗處喪無禮不可以君臨萬國奉承宗廟便當廢之云何禪讓十一月廢宏爲海陽王宏就車容色自若幽宏及程后南陽王恢子崇訓宮尋殺之時年二十二

石虎

石虎字季龍勒之從子勒父朱幼而子之故或謂之勒弟晉永興中與勒相失嘉平元年劉琨送勒母王及虎于葛陂時年十七性殘忍好馳獵誼遊無紀度尤善彈數彈人軍中每患之勒曰王曰此是凶暴無使軍人殺之聲名可惜宜自除也王曰快牛犢子小時多能破車爲復小忍勿怯之至十八檢攝恭謹嚴重愛士弓馬迅捷勇冠當時勒深喜焉拜征虜將軍性酷虐無道軍中勇幹策略與己侔者輒因事害之至於降城陷壘坑斬士女鮮有遺類勒屢加責誨而行意自若然御衆嚴而不煩莫敢犯者指授攻討所向無前故勒寵信彌隆仗以專征之任既廢殺宏稱居攝趙王建武元年正月大赦改元虎荒遊廢政外耽營繕使太子還省者以書奏事選守牧祀郊廟惟征伐刑斷乃親覽之三月南遊臨江而還東大震是日觀省臺城賜匠有差九月遷都鄴宮三年徙洛陽鐘簾九龍翁仲等于鄴是歲太武殿東西宮皆就太武殿基二丈八尺下穿伏室置衛士五百人於其中東西七十五步南北六十五步皆漆瓦金錯銀楹金柱珠簾玉壁窮極伎巧起靈風臺九殿於顯陽后選召百官州郡民女以充之后庭服綺縠玩珍奇者萬餘人內置女官十八等教宮人星占及馬步射置女太史於靈臺仰觀災祥以考外太史之虛實禁郡國不得私學星讖左校令成公段造庭燎于崇杠之末高十餘丈上盤置燎下盤置人絙綴上下虎試而悅之三年太保安樂等文武五百九人上皇帝尊號

安等方入而庭燎油灌下盤死者七人虎大怒腰斬成公段于閭闔門即天王位南郊大赦親王貶爲郡公藩王爲縣侯太子遂總百揆其后荒酒淫色驕恣無道或盤遊於田懸管而入或夜百騎宿于宮臣家淫其妻妾裝飾宮人美淑者斬首洗血置於盤上傳共視之又納諸比邱尼有姿色者與其交褻而殺之合牛羊肉煮而食之亦賜左右欲以識其味也虎荒耽內遊威刑失度遂以事爲可或呈之虎怒曰小事何足呈也時有所不聞復怒曰何以不呈請責杖捶月至再三遂甚愠私謂中庶子李顏等曰官家難稱吾欲行冒頓之事卿從我乎顏等伏不敢對事發幽遂于東宮殺之及妃張氏并男女二十六人盡賜死合一棺埋之誅其宮臣友黨二百餘人立河間公宣爲太子建武六年追尊號考樂平敬公爲太宗孝皇帝八年六月上黨孟門上有神人之像坐于山上三日而去虎遣使以太牢祀之九年十二月武鄉送雄虎變爲雌產一狼子曰噬虎腦而殺之后三日狼子亦死佛圖澄聞之流涕十年虎起河橋於豐昌津探石爲中濟石無大小輒隨流用工五百餘萬不成虎如豐昌津沉璧告誠璧浮於渚水波上騰津所殿觀莫不傾壞壓死者百餘人虎患甚斬工匠而還十一年發雍梁十六萬人成長安未央宮又發司豫荆兗二十六萬人成洛陽宮十三年二月虎親耕籍田于桑梓苑十四年三月虎夢龍飛西南自天落地旦而問澄公公曰禍將至矣陛下宜父慈子和深以慎之四月秦公韜起宣光殿于太尉府梁長九丈太子宣

視而惡之斬匠截梁而去韜怒增之十丈宣聞之悲甚謂楊杯半成等曰韜凶豎悖逆敢違我如是汝等能殺之者吾入宮盡以韜之國分封汝等韜既死主上必親臨喪因行大事無不濟矣楊杯等許諾八月殺韜宣奏之虎哀絕久之乃蘇召太子宣鑒繫于郊北火焚殺之議立太子於東堂虎曰吾欲以純灰三斛洗君服穢惡故生凶子兒年三十便欲殺父今世乃十歲比其二十吾已老矣齊公世爲皇世子立昭儀劉氏爲皇后十一月享羣臣於太武殿前佛圖澄殿上褰衣而行吟曰棘子成林將壞人衣虎發石而視之有棘子生焉冉閔小字棘奴也十二月辛巳雷大霖雨虎問佛圖澄澄曰其爲我乎至戊子而澄卒大寧元年正月虎僭卽皇帝位于郊大赦改年二月有沙門從雍州來稱見佛圖澄西入關虎掘之無尸唯有一石虎惡之曰石者朕也葬我而去吾將死矣因而寢疾四月薨於金華殿晉書曰季龍始成康元十五年世子卽位尊劉后爲太后彭城王遵先鎮關右至是勒兵而還戎卒九萬次於蕩陰石閔爲前鋒都督太后命授遵丞相加九錫增封十郡己丑安陽亭賁甲曜兵入自鳳陽門升太武前殿盡哀退如東閣羣臣敦勸卽位大赦封世爲譙王邑萬戶廢太后劉氏爲昭儀尋皆殺之世立凡三十三日尊其母鄭氏爲皇太后立妃張氏爲皇后大司馬義陽王鑒爲太傅沛王冲爲太保石閔爲都督中外諸軍事錄尙書事甲午太武殿災諸門觀閣蕩然其乘御服燒者太半光燄照天月餘乃滅己未雨血周徧鄴城六月

葬虎顯原陵僞諡武皇帝廟號太祖十一月石閔劫司空李農及右衛王基密謀共廢遵閔使將軍蘇彥周成帥甲士三十八人執遵於南臺如意觀遵時方與婦人彈碁問周成等曰反者誰也成曰義陽王鑒當立遵曰我尙如是汝等立鑒復能幾時遂殺之于琨華殿誅鄭太后張皇后遵字大祗虎第九子凡在位者百八十三日鑒卽位大赦以石閔爲將軍封武德王李農爲大司馬鑒使中書令李松殿中將軍張才等夜誅閔農等于琨華殿不克禁中擾亂鑒僞不知夜斬松等於西中華門龍驤將軍孫伏都劉銖等結羯士三千人伏于胡天亦欲誅閔等時鑒在中臺伏都帥三十餘人將升臺挾鑒以攻之鑒見而問其故伏都曰閔農等反已在東掖門臣嚴帥衛士謹先啓知鑒曰卿好陳力勿憂無報也伏都等攻閔不尅閔農攻斬伏都等自鳳陽門至琨華橫尸相枕諸胡羯無少長皆斬之死者二十餘萬人于時高鼻多鬚至有濫死者初青龍元年正月石閔欲滅二石之號議曰孔子曰易姓而王七月者七十有三國繼趙李識書炳然且德星鎮衛宜改號大魏易姓李氏又大赦閏月改元廢鑒殺之誅虎孫三十八人盡殪石氏鑒在位一百三日鑒字大郎虎第三子也

石閔

石閔字永曾虎之養孫也父瞻字宏武本姓冉名良魏郡內黃人其先漢黎陽騎都督累世牙門勒破陳午於河內獲瞻時年十二長而勇悍便弓馬臨陣不顧勒奇之曰此兒壯健可嘉命虎子之歷位左僕射

將軍封西華侯閔幼而果銳虎撫之如孫及身長八尺善謀勇力絕人虎卽位封爲脩武侯歷位北中郎將虎之敗於昌黎閔軍獨全由此功名大顯永興元年閔月司徒申鍾司空郎蘭等四十八人上尊號於閔僭皇帝位于南郊大赦改元號稱大魏復姓冉氏追尊祖隆元皇帝考瞻烈祖高皇帝尊母王氏爲太后妻董氏爲皇后子智爲皇太子以司馬李農爲太宰諸子皆封爲縣公新興王祇聞石鑒之死稱尊號於襄國改年永寧石祇遣相國汝陰王石琨帥衆十萬伐鄴六月進據邯鄲閔盡衆拒之琨軍大敗二年三月閔攻襄國百餘日祇怯乃去皇帝之號改稱趙王遣太尉張奉乞師于慕容儁中軍張春請救子姚弋仲三月祇相國汝陰王琨自冀州救祇弋仲復遣子襄帥騎三萬八千儁遣將軍悅綰帥甲士三萬勁卒十三萬四方攻之祇衝其后閔師大敗閔與千萬騎奔還鄴祇使劉顯帥衆十萬追奔伐鄴閔盡衆出戰大敗之追奔至於陽平顯懼密使請降求殺石祇爲効四月劉顯殺祇及其丞相樂安王炳太保張舉等遣拜顯上大將軍大單于冀州牧祇炳皆虎之庶子也七月劉顯稱尊號襄國三年二月劉顯帥衆伐常山太守蘇彥告難閔帥八千救彥敗顯于常山追奔及于襄國顯大將軍曹伏駒開門爲應遂入襄國誅顯及其公卿已下百餘人焚襄國宮室遷其民于鄴三月慕容儁已尅幽薊略地至於冀州閔帥騎擊之與慕容恪遇於魏昌城恪方陣而前閔衆寡不敵所乘赤馬曰朱龍日行千里潰圍東奔行二十餘

里馬無故而死遂爲恪所擒送之于薊儁立閔而問之曰汝奴僕下才何敢妄稱天子閔曰天下大亂爾曹夷狄人面獸心尙欲篡逆我一時英雄何爲不可作帝王耶儁怒鞭之三百遣慕容評帥衆圍鄴五月送閔於龍城告庾軌廟而殺之鄴中饑人相食虎時宮人被食略盡冉智尙幼蔣幹遣詹事劉猗奉表降儁八月長水校尉馬願龍驤將軍田香開門降評蔣幹懸縊而下奔于倉垣評送閔后董氏太子智太尉申鍾及諸王公卿子薊初慕容儁斬閔于遏陁山山左右七里草木悉枯蝗蟲大起自五月不雨至于十二月儁遣使者祀之諡曰武悼天王其日大雨雹是歲太和八年也

後趙錄

前燕錄

魏崔鴻撰

慕容廆

慕容廆字奕落環昌黎棘城人昔高辛氏遊於海濱留少子厭越以君北夷世居遼左號曰東胡秦漢之際爲匈奴所敗分保鮮卑山因復以爲號會祖莫護跋魏初率其諸部入居遼西從司馬宣王討公孫淵有功拜率義王始建國於棘城之北見燕代少年多冠步搖符意甚好之遂斂髮襲冠諸部因呼之爲步搖其後音訛遂爲慕容焉祖木延左賢王從毋丘儉征高麗有功加號大都督又涉歸以全柳城之勳進拜單于遷邑遼東於是漸變胡風自云慕二儀之德繼三光之容遂以慕容爲姓廆身長八尺有大度晉安北將軍張華一見奇之謂曰君後必爲命世之器匡難濟時者也涉卒弟耐立將謀殺廆廆亡潛於遼東徐郁家太康元年國人殺耐迎廆立之太康十年又遷于徒河之青山元康四年定都大棘城所謂紫蒙之邑也永嘉六年王浚承制以廆爲散騎常侍冠軍將軍前鋒大都督大單于皆讓不受擢舉賢才官方授仕魯國孔纂宿德清望請爲賓友平原劉讚儒學該通引爲東庠祭酒其世子皝率國胄受業焉大興四年晉遣謁者拜廆使持節督幽平東夷諸軍事車騎將軍平州牧封遼東郡公丹書鉄券承制海東咸和元年加侍中位特進八年夏五月薨于文德殿年六十五葬於青山晉遣使者贈車騎大將軍開府儀同三司諡襄公皝爲燕王追諡武宣王傳稱尊武

宣帝廟號高祖

慕容皝

慕容皝字元真廆第二子小字萬年長七尺八寸雄毅善權略博學多材藝晉建武元年振武將軍永昌初拜左賢王太寧末拜平北將軍朝鮮公咸和八年六月卽遼東公位行平州刺史督攝部內九年八月晉遣謁者拜皝鎮軍大將軍平州刺史大單于遼東公承制一如廆故事七年七月立子儁爲世子四年以左司馬封奕爲長史九月奕等以皝任重位輕宜稱燕王於是上議十月僭卽燕王位于文德殿大赦境內改備羣司以封奕爲相國追尊先公爲武宣王先妣爲王后起文昌殿出入警蹕立夫人段氏爲王后世子儁爲太子是歲棘城黑石谷有大石自立而行八年七月晉使鴻臚郭忱持節拜皝侍中大都督河北諸軍事大將軍燕王其餘官皆如故封諸功臣百餘人九月遷都龍城十二年四月黑龍一白龍一見于龍山皝率羣寮觀之去龍二百步祭以太牢二龍交首嬉翔解角而去皝大悅赦境內號新宮曰和龍立龍翔佛寺于山皝雅好文籍親造太上章以代急就又著典誠十五篇並以教胄子十四年皝親臨東庠考試學生其通經秀異者擢充近侍十月饗羣僚于承乾殿右長史宋諱性貪賜布百疋令自負而歸以愧其心十五年八月皝因見白兔馳射之馬倒被傷輦而還宮引太子儁囑以後事謂曰今中原未平方建大事委賢任哲此其時也恪智勇無濟力堪任重汝其委之以成吾志九月薨於承乾殿年五十

二冬十月葬龍山諡文明王雋稱尊追尊曰文明皇帝廟號太祖陵曰龍平

慕容雋

慕容雋字宣英號第二子小字賀賴跋十三月而生有神光之異身長八尺一寸善爲文雅好辭賦至於器物車室皆著讚以爲勸戒號之八年晉遣使者拜號燕王以雋爲安北將軍東夷校尉十一年進拜使持節鎮東將軍號薨卽燕王位赦其境內依春秋列國故事稱元年正月聞趙魏大亂乃嚴兵將爲進取之計七月晉使謁者陳沈拜雋都督河北諸軍事幽冀并平四州牧大將軍燕王承制封拜一如虜號故事元璽元年正月司南車成雋大悅告于號廟四月遣輔國恪相國奕討冉閔戰于魏昌廉臺閔師大敗擒送至關大將軍蔣幹輔閔子智固守鄴城遣輔弼評等帥騎一萬以討之鄴北郡縣悉降輔國奕等一百一十人勸稱尊號令曰非常之事匪寡德所宜聞也八月尅節輔弼評等送閔后董氏太子智太尉申鍾并乘輿服物及六璽送于中山傳國璽蔣幹先以送晉雋欲神其事業言曆運在己乃詐云得之賜閔妻號奉璽君封冉智爲海濱侯以輔弼評爲同州刺史鎮鄴十月輔國恪等五百五人奉皇帝璽十一月僭卽皇帝位于正陽前殿大赦改年時晉遣使詣雋謂之曰還白汝天子我承人乏爲中國所推己爲帝矣庚午書曰追崇祖考古人之令典尊武宣王爲高祖武宣皇帝文明王爲太祖文明皇帝二年正月立后可足渾氏爲皇后升平元年正月復立中山王暉

爲皇太子赦其境內改年曰光壽初虜有駿馬曰赭白有奇相逸力石虎之伐棘城號將出避難欲乘之馬悲鳴蹄齧人莫能近號曰此馬見異先朝孤嘗仗之濟難今不欲出者蓋先君之旨也乃止虎尋奔退號益奇之至是年四十九歲而駿逸不虧雋比之鮑氏聽命鑄銅以圖其像親爲銘讚雋勒其旁置之薊城東掖門是月像成而馬死十一月自薊遷鄴三月入鄴宮大赦繕宮殿復銅雀臺以吳王垂爲東夷校尉平州刺史鎮遼東二年三月常山寺大樹自拔根出得璧二十七圭七十三光色精奇有異常雋以爲岳神之命遣尙書郎段勤以太牢祀之五月遼西獲黑兔三年三月雋夜夢石虎齧其鬢寤而惡之命發其墓剖棺出屍踏而罵之曰死胡安敢夢生天子遣御史中尉楊約數其殘酷之罪鞭而投之漳水十二月雋寢疾謂大司馬恪曰吾患憊然恐不濟脩短命也復何所恨但二寇未除景茂冲幼慮其不堪家國多難吾欲遠追宋宣以社稷屬汝恪曰太子雖幼天縱聰聖必能勝殘去暴不可以亂正統雋怒曰兄弟之間豈虛飾乎恪曰陛下若以臣堪荷天下之任者寧不能輔少主也雋曰若汝行周公之事吾復何憂四年正月雋薨于應福前殿年五十三僞諡景昭皇帝廟號烈祖葬龍陵雋雅好文籍性嚴重未曾以慢臨朝雖閑居晏處亦無懈怠之色

慕容暉

慕容暉字景茂雋之第三子元璽三年封中山王尋立爲皇太子光壽四年僭卽帝位大赦改元建熙元

年以太原王恪爲太宰錄尚書行周公事專百揆上庸王評爲太傅贊朝政司空陽鷺爲太保吳王垂爲河南大都督十州諸軍事兗州牧鎮梁國四年正月暉南郊十月太尉奕迎神於和龍初暉委政太宰恪專受經于博士王勸助教尚錄祕書郎杜詮並以明經講論左右至是通諸經祀孔子於東堂以勸爲國子祭酒錄國子博士詮散騎侍郎其執經侍講皆有拜授八年太宰恪卒九年十二月有神降于鄴自稱相女有聲與人相接數日而去十年四月立貴妃可朱渾氏爲皇后六月晉大司馬桓溫率衆五萬來伐遂至枋頭吳王垂大敗斬獲三萬餘級溫奔還淮南垂旣敗溫威德彌振太傅評大不平之太后遂與評謀殺垂十二月垂出奔秦十一年六月秦輔國將軍王猛鎮南將軍楊安率衆六萬來伐以太傅評下邳王厲等帥精兵三十萬拒秦師于潞州州郡盜賊大起鄴中恠異非常十月評及猛戰于潞州評師敗績單騎遁還猛乘勝追奔長驅至鄴十月符堅帥衆會猛來攻拔鄴城外亂散騎侍郎徐蔚等率扶餘高句麗及上黨質民子弟五百人夜開城門引納秦師暉與太傅評左衛將軍孟高等數十騎出奔昌黎堅遣將軍郭慶帥騎五千追之及暉于高陽秦將巨武執暉將縛之暉曰汝何小人而敢縛天子武曰我梁山巨武受詔縛賊何謂天子耶執暉送鄴堅問其奔狀暉曰狐死首邱欲歸死于先人陵墓耳堅哀而釋之令還宮率文武出降堅入鄴宮昇正陽殿徙暉及王公已下并諸鮮卑四萬餘戶于長安封暉新興郡侯

邑五千戶尋拜尚書堅征臺城爲平南將軍別都督淮南之敗隨堅還長安旣而吳王垂攻苻丕于鄴中山王冲起兵關中暉謀殺堅事發爲堅所誅年三十五歲僭稱尊號僞諡幽皇帝

前燕錄